

Stizuns da vendita per «daletgs alpins»

Grischun Vivonda SA avra las emprimas stizuns a Maiavilla e Jenaz

DA MARTIN CABALZAR/FMR

■ **La nova interpresa Grischun Vivonda SA vul promover la vendita da products regiunals ed avra perquai mez december a Maiavilla ina stizun cun in sortiment da 150 products regiunals che derivan da 50 producents dal Grischun.** La

finamira dal program GrischunVIVA che sa stenda sur plirs onns e vegn sustegnì dal maun public vul promover ed emoziunalisar ils products regiunals, augmentar lur dumonda e posiziunar il Grischun sco metropola dals daletgs alpins. Suenter intensivas lavurs preparatoricas pertutgant program e communicaziun realisescha Grischun Vivonda uss la commercialisaziun dals product regiunals sut la submarca GrischunVIVA, sco quai che *Gieri Spescha* ha declerà. La finamira saja da sa posiziunar cun in agen sortiment, d'avrir atgnas stizuns en il Grischun e da vender ils products regiunals certifitgads sin il martgà svizzer. «Il project da Grischun Vivonda gida essenzialmain da profilar il Grischun anc dapli en il sectur daletg e regionalità», di Spescha. Per *Eugen Arpagaus* da l'Uffizi chantunal d'economia e turissem è questa collavuraziun in ulteriur pass impurtant per l'istorgia da success da la marca Grischun: «Cun la popularità da la marca Grischun pudain nus uss anc augmentar la visibilitad e dar uschia in bun stimpel da partenza al project Grischun Vivonda.»

Emprim post da vendita a Maiavilla

L'emprim post da vendita da Grischun-Viva vegn avert mez december en il pausadi d'autostrada a Maiavilla. Sco quai



Gia mez december avra l'emprima stizun da Grischun Vivonda en il pausadi da l'autostrada a Maiavilla.

FOTO GRISCHUN VIVONDA

che *Christoph Caprez*, il parsura dal cussegl administrativ da Grischun Vivonda SA ha infurmà ier a la conferenza da medias, cumpiglia il sortiment da partenza 150 products regiunals certifitgads che derivan da 50 producents dal Grischun. La nova interpresa lavura en stretga cooperaziun cun Alpinavera che promova la vendita dals products agrars. Sper rauba frestga, sco puma e verduras, ha il client er ina gronda schelta da products da latgiras e charns, raubas da pasta e granezza, sco er mels e confituras e bavrondas. Plinavant datti era vins exclusivs dal Signuradi grischun. In ulteriur ac-

cent vegn dà en questa stizun materialisada a moda autentica al tema aua che vegn visualisà cun ina gronda funtauna da stil particular.

Center da competenza a Jenaz

A Jenaz en Purtenza en la vischinanza da la Via naziunala 28 vegn realisà in veritabel Center da competenza per regionalità. Sin ina surfatscha da 500 meters quadrats vegn realisà tant ina stizun sco in bistro. Il stabiliment concepì en lain grischun cumpiglia dentant era in agen manaschi da producziun per products regiunals sco er localitads da sentupada ed

events. Latgna producziun cumpiglia tant charn setgentada e fritgs setgentads, dentant er las tratgas culinaricas classicas dal Grischun sco maluns e capuns. «La purschida da Grischun Vivonda vul dentant era tegnair quint da las tendenzas actualas da la clientella per products vegetaris e vegans», declerà Caprez. En in lavuratori d'innovaziun duain ulteriurs products vegnir sviluppads.

Mo in'entschatta

Sco quai che Grischun Vivonda punctuescha duain Maiavilla e Jenaz esser mo l'entschatta d'ina rait da vendita pli gronda. Ins saja gia uss a l'evaluaziun d'ulteriurs lieus cunzunt sper vias fitg frequentadas ed en las destinaziuns turisticas, punctuescha Caprez. Per la realisaziun dals dus projects a Maiavilla e Jenaz èn previsas investiziuns da 4,14 milliuns. La Regenza grischuna sustegna quest project cun passa in milliun. Vidlonder vegn anc ina contribuziun federala da 160 000 francs per la realisaziun da projects tranter 2021-2023. Tenor il schef da l'Uffizi chantunal d'agricultura e geoinformaziun *Daniel Buschauer* è la vendita directa da grond'impurtanza per l'agricultura grischuna. «I mancan dentant per gronda part posts da vendita nua ch'il grond sortiment da specialitads grischunas po vegnir fatg amogna als clients ed als giasts a moda concentrada e cumpletta», di Buschauer. Las novas stizuns na duain dentant betg esser ina concorrenza tar las pitschnas butias sin il bain puril, mabain cumplettar quellas.